

LETTRE DE
MONSIEUR
BODIN.



A PARIS,

Chez Guillaume Chaudiere, rue S. Jacques,
à l'enseigne du Temps, & de l'Homme
sauvage.

20 Janvier M. D. XC.

AVEC PERMISSION.

Case

F

39

.326

159060

THE NEWBERRY
LIBRARY



LETTRE DE MONSIEVR BODIN.



ONSIEVR,

Depuis trois iours, vn de mes amis vous ayant visité, m'a rescript que vous estiez demeuré fort estonné de ce que i'estois **LIGVÈRE**: & pour responce ie vous diray que ie suis tres-aise sçauoir

que vous portiez bien. Et quant à la **LIGVÈRE**, ie ne vous sçauois dire autre chose, sinon qu'estât dans vne ville il est tres-necessaire, ou estre le plus fort, ou du party du plus fort, ou ruyné du tout. Certainement i'ay soutenu le party du feu Roy autant que la charge que i'ay & que l'honneur me l'ont permis: iusques à ce que me voyant sur le poinct d'estre assommé avec deux cents d'autres qui tenoient pour le Roy, si ie n'obeïssois aux Arrests de Messieurs de Parlement, qui par deux fois me furent enuoyez par Monsieur le Procureur general: outre que deux hommes faillirent de me harquer. Alors, dis-je, voyant le Regiment du Capitaine Bourg prest d'entrer en cette ville pour tuer, piller, saccager ceux que lon appelloit **REALISTES**; ie vous confesse ie passay carriere, me

A ij

souuenant de la maxime tant vulgaire, qui dit que Le salut du peuple est pour loy souveraine: ioinct qu'une necessité forcee n'est iamais sujette à la recherche des Loix humaines. Et neantmoins nous sommes presque les derniers de deux cents bonnes villes, & sept Parlements qu'il y a en France, qui auons entré ouuërtement au party qu'on appelle La sainte VNIION des Catholiques. Vous sçauiez que les Iurisconsultes ont accoustumé de respondre, selon le faict qui leur est posé, & non pas dire tousiours ce qui leur semble à tout le monde, & lors seulement qu'il en est besoing. Et vous declare qu'il n'y a hõble sous le Ciel à qui ie voulusse plustost fier ma vie & mon hõneur, qu'à vous. Vous sçauiez les reproches que tant de personnes, & sur tout Monsieur de Lorges m'a fait, d'auoir esté le plus Regaliste qui fut onques de ma qualité: i'appelle à tesmoing vn de Messieurs de la Cour de Parlement, quand il vint en cette ville vn mois apres le massacre de feu Monsieur de Guise: comme ie feis iurer fidelité & obeissance au feu Roy par tous les habitãs ou la pluspart. Et neantmoins ie n'ay sçeu si bien faire, qu'il ne se soit trouué en mesme temps vn Ligueur d'un costé, & vn Regaliste de l'autre, qui ont obtenu mon estat: ce qui ne se pouuoit que pour causes du tout cõtraires. Mais apres auoir le tout bien & meurement considéré, ie trouue que c'est icy vn vray iugement de Dieu, qui n'est point seulement pour mon particulier, qui puis auoir meffait comme estant homme: mais general pour toute la France, qui a commencé aux plus grands Princes, & continuera tant & si auant

qu'il n'y aura ville, place ny chasteau, bourgade ny village: qui ne soit chastié des vns ou des autres; & quant & quand remply de seditions, massacres, querelles & inimitiez intestines: & depuis les plus grands iusques aux plus petits chacun sera chastié en sa personne, ou en ses biens, & moy, peut estre, des premiers: car ie ne vaux pas mieux que les autres. Et preuoy que cette ville (encor que elle ne se puisse battre que mal-aisément à force de canon, & qu'elle soit hors de la sappe, mine & escallades) neantmoins elle est pour estre prise, & tumber entre les mains de nos ennemis: & de ma part, ie souffriray patiemment la perte de mon Estat, & de mes biens, voire de ma vie; pourueu que ie puisse seruir au public. Vray est que ie voudrois deuant, iouyr de vostre presence; n'y ayant personne par deça à qui ie puisse communiquer les beaux & notables discours dont ie desire vous faire part: & vn œuure qu'il faut que vous voyez au parauant qu'il soit publié. Que si vous me demandez ce qu'il me semble de tout cecy: ie vous diray en vn mot; Que ie preuoy que cette guerre ne finira de cinq ans, & que la pluspart de la noblesse y tumbera: & que les forces du Royaume seront tellement affoiblies & diminuees; que chacū s'en esbahira: & en fin Dieu, qui tousiours a aymé ce Royaume & ne l'habandonnera point, nous donnera vn Roy à son plaisir, tout autre que les hommes ne pensent. Ce que ie dis semble peut estre vn songe, & toutesfois ie preuoy que ce sera, peut estre, vn oracle & prophetie, d'autant que mon opinion est fondee en grand iugement & raison: laquelle donne loy à toutes cho-

ses. Et pour confirmer mon opinion, l'ay apperceu par la connoissance des histoires tant sacrées que prophanes, que les grands & notables changemens des Empires, Royaumes & Monarchies, se font en cinq ou six ans, le septiesme estant le nombre sacré, mystic & diuin, auquel le repos & la tranquillité se donne: à fin que l'homme n'entre en desespoir, & qu'il ne perde courage, & qu'il trouue relasche en ses miseres. L'annee passée que commencerent les Barricades fut la premiere, cette cy est la seconde, qui a esté plus rude que la precedente: & toutesfois ce n'a esté que jeu au prix des autres qui suyront, lesquelles seront horribles, estranges, & merueilleuses. Vous me direz; la Paix se fera: les Princes s'accorderont: cela ne se peut esperer; car les pretendans, les Chefs & les partisans sont appointez cōtraires, tant en l'Estat qu'en la Religion, qu'en leurs mœurs, façon & inclinations: & ne se peuuent aucunement accorder, à parler naturellement, car Dieu est par dessus, & en fera comme il luy plaira. Bref voicy vne partie la plus forte d'une part & d'autre, qui fut iamais de memoire d'homme en la Chrestienté, & dont l'ysue emportera la ruyné ou le reſtablishement de la Religion, des armes, & de la iustice, & de toutes bonnes choses ou mauuaises parmy l'Europe. Car ne voyez vous pas comme aujour d'huy toute la Chrestienté est bandee de toutes parts? Considerez ie vous prie le party du Roy de Nauarre, vous y trouuerez quasi tous les Princes du sang, les Mareſchaux de France, les principaux Officiers de la Couronne, les deux tiers de la Noblesse, & des plus vieux Cappi-

taines, les plus experimentez soldats que lon appelle les Dragons, plus horribles aux petits enfans que n'ont esté ceux de la fabuleuse antiquité; tous les huguenots, politiques, heretiques, & atheistes: & se peut dire qu'ils tiennent cinquante bonnes villes, mesmement de celles qui sont Frontieres, & sises sur la mer, dont ils peuuent tirer de grandes commoditez: ils ont tout cela dans le Royaume. Ce n'est pas tout, car hors le Royaume ils sont encores plus forts, ayans le Royaume d'Angleterre qui les fauorise, les Rois d'Escolle, de Dannemarc, de Suede, qui sont leurs alliez: quatre Cantons des Suisses, les Princes protestans d'Allemagne, qui sont forts & puissants, & ont hommes & argent pour secourir leurs alliez toutes & quantes fois qu'ils voudront coucher de leur reste. Venons maintenant à jetter l'œil sur le party de la Sainte VNIION, dont est Chef auiourd'huy Monsieur le Duc de MAYENNE, Prince doué de tresgrandes vertus tant de corps comme d'esprit: vn des meilleurs Cappitaines de la Chrestienté, qui oncques n'assiegea place qu'il ne l'aye prise, a souuent gaigné, n'a rien perdu par sa faulte, ains souuent reparé les fautes d'autrui: & dont il semble que Dieu se vueille seruir pour estre Protecteur de la Religion & de l'Estat, cōme iadis fut Charles Martel, portant mesme nom que luy: de maniere qu'on ne sçauroit dire que ce Party ne soit fauorisé d'vn bon Chef, qui outre l'interest public, peut iustement poursuyure la vengeance de ses deux freres occis malheureusement par le mauuais conseil de ceux qui portent les armes auiourd'huy, & sont de

contraire patty. Et pour opposer aux Princes du sang de la maison de Bourbon, dont il n'y en a que quatre portans les armes, Si vous contez bien, vous en trouuerez seize en la maison de Lorraine, tous de ce party : outre les Parlements, qui tiennēt la souueraine Iustice, dont des sept il n'y en a que deux qui reconnoissent le Roy de Nauarre : encores est ce à la charge & condition qu'il se declarera Catholique. Tout le Clergé de France, duquel, estant bien mesné, on peut tirer de grands secours. Toutes les villes capitalles (horsmis Bourdeaux) presque toutes les Prouinces entieres, & cent cinquante bonnes villes : lesquelles ne scauroient si peu contribuer que ce ne soit vne tres-grande force. Voyla que c'est des Partys dans le Royaume. Voyons dehors si il n'est point encores plus fort. Vous y trouuerez le P A P E & le Saint S I E G E, Chef de l'V N I O N. L'Empereur, le Roy Catholique; que nous pouuons nommer sans flatterie, le plus grand Prince portant tiltre de Roy, qui fut il y a cinq cens ans en la Chrestienté; comme celuy qui succe les deux mammelles dorees des deux Indes : Le Duc de Sauoye son gendre, Les Ducs de Floréce, de Ferrare, de Mantouë, Les Princes Catholiques d'Allemagne; Les trois Archeuesques Electeurs. Et pour n'auoir faute de bons Chefs de guerre, encores moins en sont ils despourueuz : Ayans de leur party deux Princes, que le sieur de la Nouë en ses Discours a iugez les plus dignes & capables de conduire vne armee contre le Turc (ne se voulāt point seruir de feu Monsieur de Guyse ny de Monsieur de Mayenne) leur ayant
 preferé

preferé Monsieur de Lorraine (pour auoir fauorise sa deliurance) & le Duc de Parme (ie ne sçay pourquoy) auquel il donne cest honneur d'estre vn des plus grands Cappitaines , & des micux entendus à assieger & prendre places. Cela n'est que pour le regard de la force des hommes & des moyens qui semblent plus grands que ceux que nous auons dict du costé du Roy de Nauarre. Quant à la IUSTICE & bonté de la cause : qui doute que les Catholiques ne soient en possession depuis tantost seize cents ans ? N'est ce pas assez pour prescrire, quand lon voudroit debattre leurs tiltres de nullité ? Ne sont ils pas bien fondez en l'interdict commun ? & qui sont les Iuges non suspects, qui ne donnent arrest à leur proffict, & qui ne dient que pendant la vuidange du procez ils ne doivent estre troublez ? Je dis mesme par la confession du Roy de Nauarre, qui se submet (par apparence) au iugement de l'Eglise ; & consent de passer par l'aduis d'vn Concile libre. En quoy il faiet vn preiudice à sa cause, de la bonté de laquelle il doute encores : & par consequent, estant en litige le benefice, il ne doit point troubler ceux qui en sont en possession plus que triennale, & disent en auoir bons tiltres, encores qu'il ne soit besoing de venir au fonds. Quant à l'ESTAT, & au principal nœud de la matiere, il est tout certain, que tous les Maistres en demeurent d'accord : & n'y a doute de cela entre les sçauans Iuriconsultes, pourueu qu'ils ne soient corrompus par argent, ou trāsportez de passion. Puis la Loy du Royaume defere la Couronne à la plus proche maison venant en directe ligne de

la race des Roys. Et ceste coustume est conforme à la loy de Dieu: & a esté suivie & approuvee par la loy des douze tables. Or est il que Monseigneur le Cardinal de B O V R B O N, à compter depuis le Roy Sainct Loys, se trouue descendu par son fils Robert de France Conte de Clermont, duquel est venue la branche de Bourbon, à prendre de pere à fils, au treziesme degré: & le Roy de Navarre au quatorziesme, & partant plus esloigné d'un degré. Et d'autant que chacun y vient de son Chef, & que la Couronne n'a iamais esté deferee à la maison de Bourbon, sinon maintenant: Et que le feu Roy de Navarre estant mort du viuant du Roy Charles, n'y eut iamais aucun droit pour le transmettre à son fils: sans aucune difficulté par la loy du Royaume (comme j'ay dict) la Couronne appartient à Monseigneur le Cardinal de B O V R B O N, & n'en peut estre frustré que par l'vsurpation & violence, contrainte à la loy, & reprouvee de Dieu & des hommes; quelque chose qu'on vueille dire au contraire, partie par ignorance, partie par faction, outre la passion & mauuaise volonté qu'ont plusieurs du contraire party, lesquels ne veulent reconnoistre la verité, pource qu'il semble que cela porte preiudice à leurs pretensions: qui est de faire rumber la Couronne à vn Prince de leur religion, & duquel ils esperent proffit & aduancement, sans aucun respect des Loix & de la raison. Je scay bien qu'on dict que le Roy de Navarre y vient par representation, mais cela est induire vne nouuelle jurisprudence. Car il est indubitable, tant par le droit commun, que par toutes les coustumes presque du

Royaume de France; Que representation n'auoit point lieu en ligne directe: mesme en la Coustume de Paris & plusieurs autres. Et ainsi se prattiquoit anciënement, dont y a plusieurs arrests de la Cour de Parlement de Paris, & mesmes a esté confirmé par exemples. Pour le verifier, ie ne veux autre chose que le iugement de ce grand Empereur Charles surnommé le Grand, lequel de son viuant en plaine assemblee des Estats tenus à Maïence, adiuagea le Royaume à Loys Debonnaire son troisieme fils, & le prefera à son petit fils descendu de son aîné Pepin Roy d'Italie, mort du viuant de son pere: & fut exclus Bernard ou Berruart fils dudit Pepin, bien que descendu de l'aîné: & fut reconnu pour Roy ledict Loys Debonnaire son oncle, par iugement de son grand pere. La verité est que ledict Bernard & sa posterité querellerent le Royaume, mais ils n'y sceurent iamais rentrer: & ne trouuerent faueur quelconque parmy la Noblesse; laquelle, bien que depuis ledict Loys Debonnaire feust fort affligé & tourmenté par ses enfans, ne l'habandonna iamais: & le feit restituer par deux fois en ses Estats & honneurs, & le procez faict aux auteurs de sa destitution, si bien qu'il mourut en paisible possession tant de l'Empire comme du Royaume; & fut Roy apres luy son fils Charles le Chauue, & sa posterité tint le Royaume iusques au dernier de la race, qui fut le Roy Loys fils de Lothaire, apres la mort duquel Hue Capet du gré & consentement des Estats, fut estably Roy: & a voulu Dieu continuer la Couronne en ses descendans durant six cens ans entiers, ce qui n'aduint iamais

en Royaume de la Chrestienté. Et ne sert de dire que ce iugement de Bernard fils de Pepin Roy d'Italie fut donné par faueur du grand pere: car en telle matiere arguer le iugement d'un si grand Prince, qui n'ignoroit rien en matiere des loix: cela n'est receuable. Et cest exemple n'est point seul, car il se trouue que par iugement donné par le Pape Clement cinquiesme, conforme à l'aduis de tous les sçauans Iuriscōsultes, en la succession du Royaume de Naples, le Roy Robert troisieme fils de Charles second dict le Boiteux, Roy de Naples, fut preferé à son nepueu Carobert fils de Charles Martel frere aisné dudit Robert, qui est le vray cas où nous sommes: où l'oncle exclud le nepueu fils du frere aisné. L'autre exēple est aduenue de nos iours en la personne de Don Antonio, pretendante le Royaume de Portugal contre le Roy d'Espagne qui le possede auourd'huy du droit de la Royne Isabel sa mere. Car il est tres-certain que ledict Don Antonio estoit fils de Loys, & petit fils du Roy Emanuel, & estoit sondict pere plus aagé de six ans, que n'estoit le Roy Dom Henry Cardinal Prestre, mort depuis peu d'annees. Et toutesfoies de son viuant ledict Dom Antonio ne se plaignit iamais d'estre exclus par son oncle, encores qu'il fust fils de l'aisné: comme il se verifie par la genealogie des Roys de Portugal. Et quant à la representation en ligne collaterale, elle n'a iamais esté receuë qu'à vn cas: sçauoir est en la succession d'un Oncle, quand l'on admet les nepueuz avec l'oncle: ce qui a esté introduict depuis vn peu en la Coustume de Paris, & au parauant n'auoit lieu. Mais ce droit

n'est considerable au fait qui s'offre, car il ne s'agit
 pas icy de la succession de la maison de Bourbon,
 ny d'une succession débattue entre l'oncle & le
 nepveu qui eust appartenu au frere de l'oncle, d'au-
 tant que le feu Roy dernier mort n'estoit en ce de-
 gré de parenté ny à l'un ny à l'autre. Car comme
 Princes descendus de la maison de France, toute
 leur parenté qui estoit de l'estoc paternel passoit le
 dixiesme degré: & partant n'estoit plus considera-
 ble, & faut par necessité que chacun y vienne de
 son chef sans se pouuoir aucunement ayder de re-
 presentation. Je diray bien plus, qu'entre deux cou-
 sins germains estans en mesme degré, le plus vieil
 emporte, quand il est question d'un Fief individu,
 comme d'un Duché, Comté, Marquisat, ou Baroni-
 nie. Or est il certain que le Royaume de France ne
 reçoit point de diuision, & doit venir solidaiement
 à celuy auquel il est deu: de maniere que si feu M^o-
 sieur le Duc de Montpensier, qui sans doute estoit
 plus vieil que Monseigneur le Cardinal de Bour-
 bon vivoit maintenât, il eust peu quereller le Roy-
 aume contre mondiect Seigneur le Cardinal: veu
 qu'ils estoient tous deux au treiziesme degré, & y
 eust eü difficulté à iuger leurs différens. Et souuen-
 tesfois a esté dict à plusieurs gens de bien qui s'en
 peuuent souuenir, par lediect deffunct Duc de Mont-
 pensier: que le Roy de Nauarre demeurant en son
 opinion, si le Roy & ses freres venoient à mourir,
 il ne luy quitteroit iamaïs sa part de la Couronne.
 Cela est sans difficulté. Et mesme si le feu Duc de
 Montpensier eust peu persuader à Monsieur le Car-
 dinal de Bourbon de repudier la Couronne, il fai-

soit place à la brâche de ceux de la maison de Bourbon & Montpensier, à l'exclusion de la maison du Roy de Nauarre & de Messieurs de Bourbon descendus du feu Prince de Condé : la raison est en ce que par disposition de droict *L'heredité estant repudiee elle accroist au plus prochain.* Et de cela il n'y a point de doute. Mais on dit pour fortifier le droict du Roy de Nauarre que Monseigneur le Cardinal de Bourbon, par contract de mariage, lors qu'il espousa la sœur du feu Roy, il luy fait cession & transport de tous les droicts qu'il pretendoit à la Couronne. A cela ie respons, que le contract n'en dict rien, bien ce dict il qu'en faueur du feu Roy de Nauarre son frere aisné, il luy quitta son droict de legitime qu'il auoit en la maison de Bourbon & de Vendosme : dont depuis il y eut querelle avec la feu Royne de Nauarre, & y eut composition de cent mil liures, dont n'y eut iamais que vingt cinq mil liures de payez, & reste les soixante & quinze mil liures à payer. Aussi le Conseil des parties eust fait vne incongruité notable, & fort inciuile entre les Roys & grands Princes de stipuler & ceder les droicts pretendus en la Couronne de France, en la presence du feu Roy Charles & de ses deux freres, estans lors en la fleur de leur aage, & eust semblé qu'on leur eust voulu faire leur fosse (comme on dict) deuant leur mort. Et m'assure tant de la bonté de Monseigneur le Cardinal de Bourbon, & de l'honneur & respect qu'il portoit au Roy & à la Royne mere, que quelques prieres qu'on luy en eust sceu faire, il n'en eust iamais voulu parler. Il y a bien plus, car ie dis & soustiens que la Couron-

ne de France n'est pas hereditaire : aussi le Roy de France n'est iamais censé & reputé comme heritier de son predecesseur , & par cette raison n'est tenu aucunemēt de ses debtes personnelles, faictes pour son plaisir , & qui ne sont tournees au profit du Royaume : ains est vn droit souverain Imperial, ou Royal que la Loy donne, qui se peut bien repudier, mais estant vne fois accepté il ne se peut donner, quitter, ceder, ny transporter. Par ainsi le Roy de Nauarre, quelque bon cōseil & subtil qu'il puisse auoir, est à mon iugement mal fondé , & tresmal conseillé, qu'il ne reconnoist Monseigneur le Cardinal de Bourbon pour Roy. Car aduenant qu'il luy eust faict repudier son droit par force, Pour ces raisons que nous auons dict cy dessus, il n'y auoir rien, & cela retourneroit à d'autre. Au contraire s'il le faisoit couronner Roy , & se gouuernast sagement, monstrât auoir affection au bien & defense de cette Couronne: & faisant publique profession de la Religion Catholique, de bonne foy & sans fraude, pourroit attirer à soy la bienveillance des Princes, prouinces, & villes Catholiques: & s'estant reconcilié à l'Eglise, & faict absoudre des censures Ecclesiastiques par nostre S. Pere, & faisant acte de bon & vray Catholique, assuerait par ce moyen l'Estat de sa maison apres le deceds de son Oncle aagé de soixante & sept ans, lequel auourd'huy il detient iniustemēt en captiuité: encores qu'il luy face entendre par lettres que c'est à son grand regret, & qu'il n'en est autheur, & qu'il desire sa deliurance: & neantmoins faict tout le contraire; ce qui met les gens de bien en grande

defiance. Que sil estoit bien conseillé il se depor-
 teroit de toutes ces rigueurs, & cōtracteroit allian-
 ce avec ceux de la maison de Lorraine, deliureroit
 le Duc de Guyse innocent, & le Duc d'Elbeuf por-
 tant aussi vne peine non meritee, ou plustost enuie:
 & cela seruiroit à appaiser & pacifier les affaires.
 V o u s voyez donc maintenant, Monsieur, que la
 cause de l'V N I O N est mieux fondee que vous ne
 pensiez, encores qu'on vueille dire que du com-
 mencement elle estoit mal fondee à cause de la re-
 bellion pretendue contre son Roy: la mort duquel
 non procogitee par iugement humain, ains venant
 de la main de Dieu, qui vse de son bras droit contre
 les Roys & Princes, quand ils se mesconnois-
 sent: faiçt plus qu'entiere preuue du merite de ses
 actions: & monstre que sa vie passée a esté peu ag-
 greable à la Majesté diuine. Car la Loy de Dieu
 dict en paroles expressees; *Tu ne tueras point, & Qui-
 conque prendra le glaiue, perira par le glaiue.* Cela est
 verifié en luy. Car d'auoir donné la foy aux Estats,
 & aux Princes, Prelats, Seigneurs, Gentilshommes,
 Magistrats & autres depurez des villes; & les auoir
 là assemblez à grands fraiz, & puis les auoir faiçt
 emprisonner par son grand Preuost: & faiçt tuer
 & massacrer, apres auoir donné sa foy, vn Prince
 valeureux & genereux sil en fut iamais, estant son
 cousin de sang, descendu comme luy du Roy Loys
 douziesme: Vn de ses principaux Officiers en qua-
 lité de Grand-Maistre de France, Pair de France à
 cause de son Duché de Guyse, & partant iusticia-
 ble des Pairs & de la Cour de Parlement, & non
 d'autres: outre le massacre de Monsieur le Cardinal
 de Guyse,

de Guyse, faiët le lendemain, de sang froid, veille de Noël durant la Messe, luy qui estoit le premier Pair de France à cause de son Archeuesché de Reims : Cardinal, & Legat du S. Siege, & Presidēt en l'assemblée du Clergé, où il s'estoit bien & sagement porté: voire que le Roy luy procuroit en apparence en Cour de Rome la Legation d'Auignon, & plusieurs autres circonstances & dependances du faiët: comme d'auoir mis les corps en pieces, priuer de sepulture, les auoir iettez dans le feu, empêché qu'ils ne fussent regrettez & pleurez, pensant en oster la memoire: cela est si cruel, si horrible & estrange, qu'il n'y a point d'apparence & beaucoup moins d'occasion de l'endurer. l'adiousteray ce qu'on m'a faiët souuenir que j'auois diët en plaine table l'annee passée, que le Roy n'eschapperoit pas l'annee. J'auois aussi escript en ma Republique que non seulement aux Monarchies & Royaumes l'annee 63. estoit climaterique: mais aussi pour le regard de la personne des Princes. Et que le feu Roy estoit à bien conter depuis Pharamond iusques à luy, le soixante & troisieme en ordre. Le Roy qui estoit Prince curieux, & qui vouloit tout sçauoir, comme iadis le Roy Loys vnzieme, (des humeurs duquel il tenoit beaucoup) auoit leu mon liure, à ce que m'a diët vn grand Seigneur de ce Royaume portant tiltre de Marechal de France: adioustant qu'il auoit bien remarqué ce passage, mais qu'il se moëquoit de tout cela, & qu'il esperoit finir ses iours en repos, ne se souciant de successeur non plus que l'Empereur Neron, qui desiroit apres sa mort que le Ciel & la terre veinssent

à se mesler pesse-messe: ce qu'il a bien monstre en seize ans qu'il a esté Roy, lequel comme l'Empereur Caligula qui en trois ans despendit follement six vingts millions d'or que l'Empereur Tybere auoit amassez par son bon mesnage durant vingt & deux ans; sans auoir faict aucun bastiment de duree, ny œuvre quelconque publique memorable, a le tout si bien dissipé & prodigué, que cent milliōs d'or ne scauroient acquitter les debtes du Royaume; lesquelles neantmoins s'il eust voulu il pouoit acquitter, au moins pour vne grande partie. I'ay entendu qu'il fault pour la seule ville de Paris quatorze cents trente deux mil escus de rente, dont il est deu trois annees d'arrages, cela monte en principal vingt millions d'or. Il n'y a ville qui ne soit incommodee, le trafficq cesse par tout: les Officiers ne sont point payez, les Champs ne sont point semez: Nous ne pouons esperer que pauureté & famine. I'ay dict plusieurs fois que nous voicy en l'annee presente, au bout des six cents ans que Hue Capet fut salué Roy en ceste ville de Laon; & le vray successeur Charles de France Duc de Lorraine pris prisonnier en ceste ville, & de là mené à Orleās où il mourut: & à present vn Charles de Bourbon vray heritier & successeur de la Couronne, est detenu prisonnier par son nepueu, & vn autre Charles de Lorraine déclaré Lieutenant general del'Estat Royal & Couronne de France, Protecteur & defenseur du party Catholique: & auquel la Couronne a de l'obligation beaucoup. Il n'y a que Dieu seul qui sçache sur le chef de quel Prince doit tumber la Couronne pour y demeu-

rer. Je ne voy pas par iugement humain que l'un
ny l'autre l'emporte sil ne se faict autre chose: En
ce pays la Nouë nous broüille, mais il ne fera ce
qu'il pretend comme i'espere. Car outre le merite
du party de l'VNIION, ie voy de toutes parts de
grands preparatifz de secours humain pour l'assi-
ster, la grace à Dieu, Lequel ie prie vous donner,


M O N S I E U R, heureuse & longue vie. De
Laon ce 20. Ianuier 1590.


Vostre treshumble & affe-
ctionné seruiteur,
I. BODIN.

C ij

1. 1000

12







THE
NEWBERRY
LIBRARY



